

SAAHÄ 28.10.2021

Nuorttälj ovdâolmooš Veikko Feodoroff

Sämmilij tuotâvuotâ- já sovâdâttâmkomissio asâtem 28.10.2021

Staatâräädi lii asâttâm Sämmilij tuotâvuotâ- já sovâdâttâmkomissio staatâräädi čuákkimist onne. Mätki lii lamaš kukke taan räi. Tuotâvuotâ- já sovâdâttâmproosees valmâštâlmist lep savâstállâm nuorttälj siärvâduvâst jo maanġa ive ääigi.

Nuorttälj ärbivuáválii haldâttâhvuáhâduv Nuorttälj sijdáčuákkim alemuu meridemvääldi kevttee sijdáčuákkimijn mij lep savâstállâm ääšist vuossâmuu tove kulmâ ive tassaaš. Talle ulmuuh onnii tehâlâš äššin tom, ete nuorttâliih uázžuh valjiđ puáttee komission jieijâs komissaar. Siämmáa ive sämmiláid uárnejji kuullâmtilálâšvuodâid, main almostittum raportist pajanij korrâsávt oovdân sämisiärvâduv epiluáttamuš proosees kuáttá.

Moonnâm ive mij pivdijm nuorttâsämmilâšsiärvâduv toohâđ Nuorttälj sijdáčuákkimân iävtuttâsâid Sämmilij tuotâvuotâ- já sovâdâttâmkomissio jesânin. Mij meridijm iävtuttiđ komissaarin haldâttâhtiettui maister Irja Jefremoff, kiäst lii nuorttâsämmilii siärvâduvâst vijđes luáttamuš. Puáttâm iävtuttâsâin siärvâduv jesâneh kyedittii vijđáht suu valjim komissaarin.

Mij lep ráđádállâm komissio mandaatist já aasâtmân lohtâseijee koččâmušâin Sämitiggijn já Suomâ staatâin. Ohtâ tehálumosijn koččâmušâin lii lamaš psykososiaallii torjuu ornim komissio pargo ääigi. Mij halijdep pyehtid oovdân huolâ nuorttâlâškielâlij psykososiaallii torjuu palvâlusâi finniimist. Nuorttâlâškielâliih palvâlusah iä lah komissio pargo älgidijn ollágin. Tuotâvuotâ- já sovâdâttâmkomissio kiedâvuš já paajeed oovdân pargostis vâdis já luis aášijd. Lii tehâlâš turviđ psykososiaallii torjuu finnim meid komissio pargo nuuhâm maņa, ko puáhtá vyerdiđ, ete torjuu tárbu lassaan tuotâvuotâ- já sovâdâttâmproosees ääigi.

Mun kijtâm Nuorttälj sijdáčuákkim peeleeest Sämitige já Suomâ staatâ ovdâsteijeid mii ráđádâlmijn já oovtâst porgum valmâštállâmpargoost. Komissio pargo álgá täst já mun tuáivuttâm komissaarâid vuoimijd já miänástume taan tehâlii já siämmást meid luis paargon. Nuorttâsämmilijn lii noonâ osko komissio pargo luhostuumân.